

"MyIdentity" Diperluas Ke Semua Agensi Kerajaan Tahun Depan – Mampu Bernama
14 Ogos, 2012

KUALA LUMPUR, 14 Ogos (Bernama) -- Unit Pemodenan Tadbiran dan Perancangan Pengurusan Malaysia (Mampu) akan memperluaskan sistem 'MyIdentity' ke semua agensi awal tahun depan susulan kejayaan projek perintis di empat agensi.

Ketua Pengarah Mampu Datuk Mohamad Zabidi Zainal berkata sejak diperkenalkan pada Disember lepas, "MyIdentity" memudahkan orang ramai yang tidak perlu memberi maklumat peribadi berulang kali ketika berurusan dengan agensi kerajaan.

"Menerusi MyIdentity mereka hanya perlu memberi MyKad dan segala maklumat peribadi mereka akan diperolehi.

"Selain itu, mereka juga boleh menyemak dan mengemas kini maklumat peribadi pada bila-bila masa di salah satu agensi kerajaan yang terlibat dengan sistem MyIdentity, bagi memastikan kesahihan maklumat tentang diri mereka," katanya kepada Bernama selepas rakaman program Helo Malaysia terbitan Bernama TV, di Wisma Bernama, di sini.

Projek perintis MyIdentity dilaksana di Jabatan Pendaftaran Negara, Jabatan Imigresen, Jabatan Pengangkutan Jalan dan Lembaga Hasil Dalam Negeri.

Rakaman itu akan disiarkan Bernama TV menerusi Astro saluran 502 pada 27 Ogos ini pukul 10 malam.

Mengulas mengenai pencapaian Malaysia melalui agenda transformasi negara yang dijalankan kerajaan, Mohamad Zabidi berkata negara telah mencapai kedudukan baik dari segi daya saing apabila berada pada kedudukan ke-21 dunia.

"Negara dah capai satu tahap yang cukup baik apabila berada di tangga 21 pada kedudukan dunia pada tahun 2012...tapi kita perlu berusaha lebih bagi memastikan kedudukan Malaysia terus meningkat dan berada pada kedudukan nombor 10 di dunia seperti yang dihasratkan Perdana Menteri Datuk Seri Najib Tun Razak.

"Kita dah berada di laluan yang betul dan momentum perlu sentiasa dijana bagi merealisasikan impian mencapai negara maju...justeru, penjawat awam perlu memainkan

peranan mereka dengan sebaik mungkin dalam menjalankan tugas yang diamanahkan," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=687900>